



МОНГОЛ УЛСЫН ТӨРИЙН АЛБАН ХААГЧДЫН ЭРМЭЛЗЭХ ЕСӨН ЗҮЙЛ



“Төрийн албаны шинэтгэл: сорилот, боломж” Үндэсний анхдугаар чуулганд оролцогчид бид эх орондоо ардчилсан, сайн засаглалыг улам төлөвшүүлэн бэхжүүлж, нийгмийн хөгжлийн таатай нөхцлийг бүрдүүлэн, төр, иргэний итгэлцэлд тулгуурласан чанарлаг үйлчилгээг ард түмэндээ хүргэхийн төлөө төрийн нийт албан хаагчид дараахь есөн зүйлийн шаардлагыг эрхэмлэн дагаж мөрдөхөөр хэлэлцэн шийдвэрлэв. Үүнд:

Нэг. Мэдлэгт суурилсан үйлчилгээ

Хариуцсан ажлаа гүйцэтгэхэд хангалттай мэдлэгтэй байж, түүнийгээ цаг үеийн эрэлт шаардлагад нийцүүлэн байнга хөгжүүлж, мэргэжлийн мэдлэг, ажил хэргийн нэгдлийн нягт хангаж ажиллана.

Хоёр. Чадварт суурилсан үйлчилгээ

Албан тушаалын чиг үүргээ хэрэгжүүлэхэд шаардагдах ажлын зохистой арга барил, ур чадварыг эзэмшиж, түүнийгээ ажлаа үр дүнтэй, бүтээлтэй гүйцэтгэхэд чадамгай ашигладаг байна.

Гурав. Хууль ёсонд суурилсан үйлчилгээ

Үндсэн хууль, бусад хуулийг үйл ажиллагаандаа дээдлэн сахиж, төрийн үйлчилгээг зөвхөн тэдгээрт нийцүүлэн хараат бус, бие даасан байдлаар хүргэж хэвшинэ.

Дөрөв. Ёс зүйд суурилсан үйлчилгээ

Төрийн албан хаагчийн ёс зүйн дүрмийг хүлээн зөвшөөрсний үндсэн дээр төрийн албанд ажиллах бөгөөд ёс зүйн зарчим, хэм хэмжээ, ёс суртахууны шаардлагуудыг эрхэмлэн биелүүлж, ёс зүйн аливаа зөрчил гаргахгүй ажиллана.

Тав. Шударга ёсонд суурилсан үйлчилгээ

Албаны үйл ажиллагаа явуулах, үйлчилгээ үзүүлэх, шийдвэр гаргахдаа алагчлахгүй, тал тохой татахгүй, ямарваа хөндлөнгийн нөлөөлөлд орохгүй, ашиг сонирхлын аливаа зөрчилд автахгүйгээр зөвхөн нийтийн ашиг сонирхолд нийцүүлж шударга ёсыг баримтална.

Зургаа. Соёлтой харилцаанд суурилсан үйлчилгээ

Иргэдэд байнга хүндэтгэлтэй хандаж, тэдний итгэл хүндэтгэлийг олох хэмжээнд харилцааны соёлыг эзэмшиж эелдэг, уриалга үйл ажиллагаа, үйлчилгээгээ нээлттэй, ил тод байлгаж, олон нийтийн санаа бодлыг авч, эрэлт хэрэгцээнд нь нийцсэн үйлчилгээ үзүүлж ажиллана.

Долоо. Үнэнч байдалд суурилсан үйлчилгээ

Төрийн албандаа ямагт чин сэтгэлээсээ өөриймсөг хандаж, түүнийг аль болох үр бүтээлтэй, илүү чанартай гүйцэтгэх талаар санаачлага, идэвх зүтгэл гарган, иргэдэд үзүүлж байгаа үйлчилгээг бүрэн дүүрэн үзүүлэх талаар боломжтой бүх нөөц бололцоог дүүрэн ашиглаж ажиллана.

Найм. Шуурхай байдалд суурилсан үйлчилгээ

Албаны үйл ажиллагааг явуулахдаа бусдад элдэв чирэгдэл учруулахгүй байж, ялангуяа иргэдийн өргөдөл, гомдол, хүсэлтэнд нэн анхааралтай хандаж, хариуг боломжтой хамгийн бага хугацаанд өгөх хэмжээнд ажлаа зохион байгуулна.

Ес. Хариуцлагад суурилсан үйлчилгээ

Албаны ажил хэргийг явуулахдаа өөрөөсөө зайлуулах, хариуцлагаас дөлөх зэрэг аргацаах зохисгүй байдал гаргахгүй, ажилдаа эзэн болж, шийдэмгий зоримог ажиллан, түүнийхээ үр дүнг биечлэн хариуцаж ажиллана.

“Төрийн албаны шинэтгэл: сорилт, сургамж” Үндэсний чуулганд оролцогчид

2011.06.23

Эрмэлзэх есөн зүйлийг дэмжин хүлээн авсан